



宛委山人詩集

炊白集

附西園三子詩



國

詩集

人

叙

海寧陳元龍撰



吾兩浙風雅山陰號稱極盛國初祁氏兄弟開
寓山園延天下士互相揚扆時吾西河師實與諸
名碩敦槃簪履朝夕周旋其後時事變遷老成凋
謝風流消歇者垂三十年康熙庚辰余內兄宋靜
溪出守越州得劉子戒謀乃大喜目爲國士時與
檢韻賦詩今集中所載蓬萊閣稿是也余讀之見
其風韻瀟洒嘆爲當今第一流人物後晤西河師
知戒謀僑居東郭與徐徵君仲山隣方是時師倦

遊返里每過徵君傳是齋與戒謀講求於大雅絕
續之關故所詣卓越下筆驚人又十餘年余猶子
世儼與戒謀同出今總憲唐益功門因得見所謂
餘不小草者已乃盡取其前後稿讀之風骨秀雋
鍊而愈精彬彬乎華爽冲融極詩家之能事矣嗟
乎有明三百年文章勲業之盛山陰人史不勝書
而談詩者必爲徐文長首屈一指戒謀詩派與文
長同出中晚唐宋元而鍊格細鑄詞醇盡洗粗黠
繁蕪之弊有過之無不及也且文長生當七子燄
張之日名不出於越非公安搜羅遺稿則櫻桃館

青藤諸集後人亦無從見之矣戒謀弱冠知名老
而彌盛上自玉堂貴客下逮閨閣縉流通都大邑
僻壤窮鄉無不知有宛委山人集者蓋我

朝化雨涵濡風和南北生其時者率皆同聲賡和
太平無門戶傾軋之習故戒謀得以老明經標幟
詩壇振興衰絕四十年來前輩交口相推後生奉
爲祭酒雖數竒與文長等而詩名之盛必傳於後
無疑者非獨余一人言之也因讀全集而弁諸首
惜乎吾師與靜溪之皆不及見也

裘馬英流多生河北菰蘆秀士半產江東塗山爲
玉帛衣冠之所王會如新靈汜乃干旌組練之鄉
霸圖斯啟峰藏金簡開前哲之光華渚種芳蘭供
後賢之紉佩生其地者彩比鳳毛居是邦也美逾
竹箭從古歷稽群彥史不勝傳於今又得一人才
尤獨絕吾友劉子戒謀忠孝子孫公卿門第黃童
髻穎能文世號無雙虬子幼聰博學居然第一漬
紅桃而作紙日量十斛松煤握青鏤以裝毫時放
千枝花蕊天孫雲錦織自懷中海客鮫珠拈來指
下道文房之隻字更屬誰歟繼夢得之豪吟真稱

宛委山房詩集 卷
作者爾乃郢曲有難賡之調祇振響於刻羽引商
牙琴無善聽之徒聊寫心於高山流水藉糟枕麴
頗厭時趨贈縞盍簪偏欣結契僉謂伊人獲覩甫
入座而俱香恒言此客若逢誠不衣而自煖且復
性愛幽閒居鄰水竹囊螢作炬非惟泛涉百家築
室為城豈僅專工五字沈休文詞華典贍名是青
箱衛叔寶韻致清揚姿同白璧花間響落盡上珠
簾隴首吟成爭鈔紈扇誰家綺席不留題千幅烏
絲是處旗亭曾高唱一篇紅豆極才人之跌宕孰
與齊驅擅名士之風流何妨獨立至若情由一往

而深境以屢遷而閱恒因所遇大放厥辭或金釭
畫角搔青髻以長謠或羅袖玉釵倚朱欄而點筆
或黃壚再過思舊侶以銷魂或華屋空存積新愁
而掩涕或登高攬古目窮於明滅之斜陽或送遠
傷離心結於萋迷之芳草或茂先未覩空騰劍氣
於蒼旻或象罔難求尚掩珠光於赤水或踏山中
之橡葉遙訪詩僧或看江上之荻花偶逢商婦或
苔侵筇屐每過羊求或竹映琴樽時邀嵇阮凡茲
觸緒興懷總藉嘯歌見志編分甲乙幾欲等身硯
潑丹鉛寧嫌脫腕伯仲於拾遺供奉之間曰仙曰

聖位置於商隱庭筠之上亦艷亦香僕憶來遊君
先合并秋風驢背快披李賀之苦吟皓月扁舟飽
聽袁宏之朗誦有句皆驚無奇不賞哀其緇帙授
彼梓人播珠璣於虎觀奚煩寫向画屏長聲價於
雞林必且珍為秘枕嗟乎小言持贈遠愧吳均大
雅扶輪定推劉惔亭畔名葩待賦將登七寶之牀
坐中麗藻常拈已掣五花之簞矣黃海吳詩成序

往余作客嶺南道經惠陽遙望羅浮四百峯歎為
奇絕時以事牽不獲一躡飛雲至梅花村問趙師
雄夢處徙倚久之篋中適貯劉子戒謀暗香浮影
詩相與微吟幽唱三復其佳而珊珊來前心魄為
動是真移情戒謀之詩同之成連海上之琴乎及
余倦游歸里戒謀已成新集種種其淡情流韻大
致與前等而彌為恢奇更能該博則尤其浸貫載
籍之功焉論者多云戒謀詩似溫李余謂從溫李
入非從溫李出則已盡攬杜韓蘇范之勝矣談詩
家今日號為極盛然皆掇取浮華忘其根柢即有

能思自刊落期進於古亦止一聯半句爲得按以
長篇考其全體又復失之未足成名惟吾同巢諸
君約爲讀騷窮經之學不爭字句余質最庸下而
戒謀之名獨艷戒謀足不出吳越宦茲土者郡守
丞下必邀相見爲酬倡交四方勝流名士探奇至
越亦無不詣戒謀廬通欵曲販夫牧豎固不識所
爲詩然見戒謀能指之曰是才子也者昨有客從
江南來謂琴川麗人張某得戒謀詩愛不釋手稱
爲詩瘦生則戒謀之名滿之香閣噫亦異矣戒謀
合前後所著隸十二卷刻成一編囑予別白其所

以其一爲天南一峯集天南之山會稽爲之雄長
同人構巢其間余因是以顏所作文今山川清淑
之氣又移而屬之戒謀蓬萊閣在郡署中戒謀嘗
觴咏其上集中所載諸作可見矣戒謀之先有夢
得者與元白諸君賦金陵懷古詩夢得詩成樂天
曰四人揆驪龍劉子已得珠所餘皆鱗爪耳戒謀
集曰探珠意或取是然則驪龍之珠其世爲劉氏
有乎戒謀侍養之餘欣爲點筆尊大人固名宿戒
謀學問成就多得之庭訓人生之樂以此爲最軒
名真樂即繫之詩萬卷樓戒謀世藏書處也得詩

宛委山人詩集 序
二卷戒謀初不出遊尊大人仙去後始棹舟吳趨
踰江至淮名其集曰吳頭楚尾歸仍戢影書樓樓
面臥龍山復別其一曰臥龍吟卷云戒謀制舉業
已登峯造極辛卯之役今總憲唐益功先生爲房
考薦擬第一人旣得復失賞惜甚至榜後邀至清
溪共晨夕此餘不小草所由作也夢墨齋則戒謀
近下帷地舉所成詩悉以屬之若暗香浮影不僅
二卷蓋戒謀僑於李氏之香雪廬積十五載詩之
多以千計茲加刪削特見亭亭讀戒謀詩者以是
序先之則大略盡矣同郡友兄田易拜譔

宛委山人詩集目錄

卷一

天南一峯集古今體詩六十六首

卷二

蓬萊閣稿古今體詩五十七首

卷三

暗香浮影集上古今體詩七十一首

卷四

暗香浮影集下古今體詩六十一首

卷五

探珠集古今體詩七十一首

卷六

真樂軒稿古今體詩六十七首

卷七

萬卷樓集上古今體詩六十二首

卷八

萬卷樓集下古今體詩六十七首

卷九

吳頭楚尾集古今體詩七十一首

卷十

臥龍吟寫古今體詩六十三首

卷十一

餘不小草古今體詩六十三首

卷十二

夢墨齋稿古今體詩六十五首

宛委山人詩集卷一

山陰 劉 正誼 戒謀

天南一峯集

山樓

溪上築高樓連蜷青山繞細雨沐煙鬟諸峰紛窈
窕晨夕擁圖書近遠恣瞻眺淥水響淙潺白雲流
縹緲古木發新花清香入硯沼微吟對夕陽鐘聲
落牕表

春雪初霽石屋山限韻

積雪連春宵湖中滿煙浪侵曉望檐前晴光流滉

澆紅輪照青山層層出翠嶂勝侶呼尋游倏覺精
神王盧舟揮清波身似銀華上嫫媪堤柳抽霍靡
岍草放駐棹入中林數里平原曠垣吸見幽巖下
臨千百丈澗雪與溪雲凍合寒難望仄步上危崖
亂石環獅象紆折出崇巔千山列仞強高下互搪
撐目中化百狀厝窟若神剗危峰與天傍盤旋玉
樹叢斯時午未餉痺肌忘辛勤豪襟彌曠宕大呼
我同游揮毫速酌唱試觀一日間竟去紅塵障若
語未來人定以吾言安安得萬卷書更求百斛釀
便向此山中百年恣放蕩一笑且還歸重來應無

恙

郊外

東風吹白袷春色滿修垞花影村西墅溪聲石上
亭雨深平野綠雲補斷山青挈榼垂楊下黃鸝盡
日聽

尋春

雁齒橋流碧漲新芳堤鹿鹿輾朱輪尋春春最飛
揚處画板鞦韆獨立人
惺忪香雨細如絲睨睨鶯雛坐柳枝幾日馬蹄青
草路又看踏過賣餠時

偕施蓮溪 啟 訪厲思晦煌城西

城西日暮多昏鴉
蔽木檉檉蒸朱霞
拉友訪友循三义
叩門一見談周遮
如鶯得侶啄春花
人驚何故私囂譁
杖頭解付黃公家
一斛痛飲歡無涯
忽來月色盈檐牙
城頭戍鼓瑟瑟搗

鑑湖春泛分韻自二蕭至九青

一曲花源一畫橋
手摩葯玉百愁消
春山自有新看譜
不學人間十樣描
如鏡湖垂萬柳梢
參差新葉影都交
綠天望入無行處
一樹飛紅判路坳

紅雨紛紛落絳桃
粉梨如雪撲輕舸
初成花樣都裁碎
底要東風作剪刀

片片春雲似綠螺
半流山上半隨波
柳姑祠下飛霞影
又結爛斑疊綺羅

青鎖疎窓淺碧紗
珠樓人倚玉闌斜
清波正落樓頭影
看作新開姊妹花

玉簫金管滿湖塘
朱粉飄風別樣香
細語休傷聽未得
憑如燕子話斜陽

十八封姨最有情
不教花柳太分明
画船底用催歸急
聽遍春溪細雨聲

煙霧迷濛結晚汀無邊春思在花舫十年作達人
誰識夢遶湖山萬疊青

賦得東望望春春可憐

東望望春春可憐平橋細浪綠搖天花中鬢影飄
香徑樓上簫聲落画船一段斜陽殘雨後半鈎新
月暮霞邊匆匆收拾尋芳興結綺疎窓掩獨眠

懷商介廬和

春深楊柳花江上紛如雪天末抱相思憂來不可
絕人生幾同心而復長離別日出聞流鶯日入聞
啼鳩春愁塞兩間茫茫那可說

偕同學諸子訪王素堂鶴齡於樊川別業

畱飲達旦卽席賦贈

春光九十歸匆匆晨興疎雨飛空濛堦前忽聞鬧
屐齒相邀同訪王無功兩岍青山亂蒼翠一篙綠
水游烏篷微浪不生雙槳疾波平江面如青銅楊
花紛舞春前雪野香暗逐田間風笑譚不知出郭
遠須臾曲港如環弓枝頭黃鳥鳴睨睨渡邊碧草
生蒙蔽柴扉兩扇臨水設千山當戶真青葱叩門
未了主人出登堂一一彎深躬遠別初見各抗禮
寒暄舊話人皆工咄嗟王郎天下士廿年壇坫稱

文雄筆端不使纖塵染胸中豈有微雲蒙讀盡五
車傾三篋要令萬物歸牢籠有時仰天哦詩句珠
璣亂落追坡翁有時捉筆一揮灑烟雲滿紙齊南
宮手持不律走天下北抵燕趙南粵東何人相見
不傾倒寧須脫帽陵王公於今欲慰倚門望十年
游子歸青驄故鄉好友積饑渴暮雲江樹時忡忡
此日相見喜欲絕開尊闌入蕭齋中奇松怪石空
庭滿牙籤玉軸匡床充零落殘花飄曲徑參差新
竹侵簾櫳片時珍錯羅几席主人真覺殊曹洪千
杯百杯互酌酢藕絲蕉葉香郛筒何遜掀髯恣大

嚼當杯氣欲凌蒼穹徐陵不語搜新句擎樽心口
如交攻手凭玉案朱萬卷微吟密咏聲淪淪隴西
公子多愁思歡場獨覺如癡聾魯恭旌欲指香浦
相逢相別情無窮而我狂態不可禁垂頭吸酒如
長虹人生惟有朋友樂譬之美玉資磨礱所恨四
方各分散南轅北轍猶飄蓬今夕何夕相聚首一
堂歡樂情融融樵青廊下刈蘭桂雪兒屏底操絲
桐倚遍綺闌玉露白吟殘樺燭芳筵紅憶昔七賢
竹林下放懷直使千秋空今宵讌集數適等時共
七人
一時高致將毋同回頭笑問諸君子不知若箇是

阿戎城遠不曾聞
戍鼓花間瞥見影
瓏璁只疑明月猶未落
那知旭日光曛曛

自笑

自笑情何僻
謀生竟未能
鬻田買古硯
貸米養詩僧
花月耽成癖
禽魚狎似朋
室人交謫我
一任絮紅燈

無題

簾押低垂翡翠寒
帳中小影怨珊珊
黃金縷帶悲連理
碧玉圓璫剩合歡
漏永城頭明月落
春深墻角杏花殘
單鳧寡鶻成消渴
抱得瑤琴不忍彈

珠斗斜傾夜月西
驚回幽夢鷓鴣啼
自憐花下當壚婦
不及盤中織錦妻
小院孤鸞調綠綺
空梁雙燕落紅泥
相思淚滴犀簾損
望斷春山翠黛低
漢代爭傳錄秘辛
游龍矯若美人身
為雲為雨巫山女
傾國傾城洛水神
夢向紗窓憐小小
癡從畫障喚真真
傷心寶鏡塵埋久
空說東家宋玉隣
贏得瑤笙臺上吹
飛來雙鳳舞參差
風搖屈戌金鋪冷
月轉梨花玉鏡移
拚取斛珠調碧玉
吟成百韻比紅兒
神雞枕畔回殘夢
不羨楊家有二姨
十五王昌新嫁孃
回文機上織流黃
參差吹徹春

將暮錯落傾殘夜未央
水滴銅龍傳永漏烟消金
鴨剩餘香枕屏山色江南遠空有紅燈照淚粧
小犢流蘓油壁車相逢顏色醜桃花珠窓謝婢新
調扇金屋吳姬舊浣紗纖指彊環圍翡翠檀槽鐵
撥弄琵琶祇憐豪客黃衫少何處能尋古押衙
苑外花開堪助嬌海棠睡醒額黃消時憐待闕鴛
鴦社畏說銷魂楊柳橋夢去緩歌紅豆曲醉來偷
弄紫瓊簫憑風吹寄霓裳去只恐雲深雁路遙
玉鏡臺前五色梳新粧纔罷轉踟躕薔薇泣露開
香徑鸚鵡嫌寒話綺疏硯匣琉璃詩博士筆床翡

翠女尚書閒窓無計消春晝漫學相如賦子虛
龜甲屏風倚綠珠曲房書札寄麻姑玉壺凍結紅
冰淚金縷寒銷白雪膚粧罷薰香調錦瑟夜來燒
燭鬪擣菹東隣姊妹俱歸去學画滕王蛟蝶圖
腸斷蕭郎愛遠游吹簫空上鳳凰樓柳枝詩句悲
紅拂桃葉歌聲怨白頭婉轉玉床貽芍葯高燒銀
蠟倚筵篔春潮有信人無信愁聽涼州與并州

寄王七素堂

我友烏衣巷風流那得過字思復作聖詩愛日爲
魔綠黛江頭渡紅裙扇底歌瘦腰止一尺憐汝奈

伊何

西園前日聚紅燭對深宵小吏鳴鼉鼓佳人響鳳
簫千花亭外密雙槩鏡中遙寂寞書樓客含情不
自聊

城南恭謁先太師遺像

古廟居城南雲影羅簷覆朱門遠岫青綠樹殘鶯
咒趨謁先精忠遺容卓宇宙秘醇藤花垂斑駁池
苔繡英靈老乾坤荔蕉香俎豆我頻謁我公凜凜
不敢就通誠向几筵裔孫願細觀望公少霽顏跪
拜肅衣袖

愛蓮閣

水閣蓮花繞榻香朱闌干外四山蒼淺紅深翠盈
堤艷細雨斜風一院涼思發可憐新杜若吟低不
擾睡鴛鴦小年無地堪消遣端合攜樽老是鄉

端溪老坑硯歌

羶羊峽中多奇石唐人宋人珍如璧琢之為硯日
磨礧疑割雲霞來几席千餘年後廣鑿搜入險絕
深不遺力鼉磯龍尾非其倫下視沉泥真瓦礫青
花白葉間紅蕤玉帶金絲形各異叶媧皇似經手
煉成秘藏五色蛟虬宅東西兩洞世共求老坑妙

宛委山房詩集 卷一
質尤難獲半規紫玉價十千鴉睛鵝眼分黃碧不
須勺水研隄麋透體潮痕潤朝夕平生嗜硯情絕
癡得此摩抄忘寢食橫經列史坐蕭齋自信書淫
勝錢癖笑持毛穎當耨鋤長向石田勤稼穡

送田易堂易入山

田子攻書史勤勞似馬融欲成千載業獨往萬山
中竹牖晨搖綠花闌夜舞紅知君多著述官寄鏡
湖東

題何公子濯足萬里流小影

凌空峭壁俯江邊下有神山小謫仙遠豁雙眸看

碧落側垂兩足劃青天美人香草思如結月扇梅
花句任傳四顧茫茫我與我纖塵一點敢飛前
一寸胸中橫九州蕭然物外擅風流借來萬里無
窮水洗去千秋不了愁綠愛危崖離地立青憐遠
岫近天浮崇岡倘忽聞清嘯是我將衣振上頭

徐夫人 昭華 於令名居見余題壁句賦四

絕見贈次韻奉答

偶然檢韻故人居荏苒流光四歲餘記不分明舊
日語尚煩錦字出香裾

紛紛詞客越江濱隋馬愁眉粧鬪新柳絮飄零燕

子散談詩還有謝夫人

原云青玉案頭有士女學書不拜衛夫人

十載幽栖一草堂斗間星尚黯無光筆花不到江

郎夢爭及班昭姓氏香

原云惟君字字驚元白不藉江花夢筆香

紗幃論詩記昔年吟成画蝶似花鮮宋庭二女家

三妹也料無人得擅前

原云多少詩家誰第一應無人在外金前

何筍山

嘉珮

歸自秦淮二律見投次韻奉

答

一片荷香裡秦淮返客舟憂君小憔悴愈覺老風

流離恨傾懷吐新詩點筆酬細搜珍物贈益以石

鄉侯

憶管分襟日牽群送子舟愁如雲乍結心共水爭

流別緒挑燈散吟聲隔巷酌從今粧閣上莫悔覓

封侯

淶水曲

淶水明於鏡蘋花白似銀盪舟浦口女莫是弄珠

人

寄竹垞朱太史

瀛洲十載羨鳴珂房杜聲名豈復過自愛黃冠歸

鑑曲任從紅藥放鑿坡孤筇醉倚山中月小艇吟

搖江上波多謝錦囊白雪句殷勤千里寄巖阿

紉蘭纒蕙集蓉裳寂寂徒嗟擁墨莊總兆文明夢
鶯鶯誰憐毛羽繡鴛鴦得逢當世千秋客敢吝平
生一瓣香愛殺幽棲朱萬卷微情結與暮雲長
黃花滿眼碧山稠綠野如何作快游柳簡牙籤羨
博洽練裙蠟屐想風流迢遙幽夢成深夜細碎閒
愁起素秋阿大遠來揚子宅指家孟叢香側身西望思悠
悠

飲酒

身與俗子緣擾擾無由避心爲塵網牽役役安能
棄思裁一片雲掩不容人至香風塞西窓閒花開

滿地呼童取清醪少求醉鄉庇一醉人不知再醉
忘百事沉醉復如何不與羲皇異乃知家叅軍沉
酒有深意

秋日雜興

露寒紅藕落殘花明月池塘處處蛙黃卷如何完
本分青山豈便作生涯浪吟詩句慚詞客時缺囊
錢累酒家所愛清齋塵不到一庭秋色最堪誇
七尺堪憐爲命拘溪山寂寂作潛夫清愁可話惟
鸚鵡短曲難聽是鷓鴣自信俗情頗未有誰言狂
態要全無小樓暑盡涼風起劇似饑人乍得餬

偶嘗世味已分明只愛吾廬適性情有一讓人不
善佞無他累我祇貪名波翻江上天流影風起林
端月作聲笑憶昨宵吟較苦疎髯又斷兩三莖
昂首乾坤不會低雲梯百尺故難躋雖如安石身
猶隱要與希文志少齊世上誰何訓白雪生前曾
否欠黃蘗吟來蓮渚微風起片片餘香尚滿泥

渡錢塘江

揚舲渡錢江江流何浩渺旭日浴秋濤輕雲逐飛
鳥水濶碧天低岼遠青山小隱隱遠林樹冪冪寒
煙繞嗟我何來斯豈為恣吟眺冷然凌秋風孤帆

飛縹緲諒哉行役人難免離憂擾

同武唐李鶴君

永祺

海昌沈岱瞻

嵩士夜

飲吳山僧舍用放翁眉州郡燕大醉中間
道馳出城宿石佛院韻

寒山寂歷秋風清暮煙一抹昏鴉鳴欲排旅悶來
僧舍誰能與我飛千觥相視莫逆有二子樽罍特
整談交情東陽博雅聞天下青蓮早歲飲香名酒
酣忽呼毛錐子各率偏師攻詩城醉墨飛隨興天
矯豪襟開放神崢嶸嗟君一飛都直上不鳴如我
人誰驚逞歡不知夜欲盡寺鐘忽報東方明

送岱瞻歸里

東陽才子沈休文，瀟灑綸巾白練裙。
不合時宜惟有我，相期古處可無君。
小橋一夜開朱鷁，極浦三秋結暮雲。
蕭瑟西風吹雁影，幾人垂淚向斜曛。
雲門蘭渚讌良辰，十五朱絃醉凍春。
盡謂少年意氣合，誰知異姓弟昆親。
行時衰柳寧堪折，到日幽蘭尚可紉。
九月南湖波渺渺，側身西望欲傷神。

登秦望山恭步先中丞蕺山曾伯祖韻

曉望平林宿霧開，崎嶇隻影入蒿萊。
烟雲盡向衣邊散，巖壑都從屐底回。
千仞何人能屢上，百年今

日記曾來松濤多處空，山寺遠見荆扉帶月推。

攬勝千尋未覺瘁，更登百仞不須商。
風鳴竹似瓊瑤佩，石蔭泉如沆瀣漿。
深谷亂雲迷謝客，斷碑殘雨泣秦皇。
小留真覺忘塵世，豈計人生彭與殤。

雨窓懷吳四丈詩成用放翁久雨道懷韻

風雨綿朝夕，百感紛櫻心。
援琴彈北牖，終曲無知音。
遐思吳季子，思比空江深。
寒烟蒙疊嶂，亂雲彌疎林。
摇摇庭外柳，嚙嚙花間禽。
端坐閉蓬戶，一卮聊孤斟。

秋風高

秋風高吹霜林紛紛葉落寒雲深空山遠送哀猿
吟哀猿吟心耿耿綠烟衰草搖金井月明小院紅
欄冷紅欄冷吞聲哭蓬頭齟齬藏金屋傾城人抱
秋風宿

臥病懷同學諸子

婆娑斗室感霜蓬綠帳低窺燈影紅好友都來清
夢裡秋聲盡送枕函中白蘋杜若懷江浦茝草茱
萸貯葯籠不識諸君相憶否多時元白冷詩筒

病起

茶濤藥火竹君邊戍鼓淒清劇可憐莫怪無情對

綠酒傷心有母在黃泉秋從萬葉聲中老月向千
山缺處圓多少愁懷新病起仰看飛雁數青天

勒小印寄魯思亭士系一絕句

採玉荆山寸許長風流名字勒生香黃金斗大何
妨握如荳如珠劇可傷

曉渡曹江送別靳司馬雁堂先生

凌晨發寒江西風吹江樹悠悠送使君縹緲孤颿
泝初日射微波晴嵐開野戍回首千峰低雲羅一
雁渡登崖望行人臨行復三顧我欲言離愁空江
鎖煙霧

夜汎吼山

幽壑斜陽裡
茫茫放越舡
一泓寒結綠
千嶂暮圍青
候月支蘭棹
臨風倒玉瓶
朗吟消寂寞
雁語不堪聽

忽見空巘下
輝輝月影流
瓏璁山樹結
曲折野雲浮
竹葉搖荒徑
梅花放小樓
所思不可見
誰與話離愁

外大父大方伯王公城北草堂賦感

北門門外霜葉枯
北風其涼吹衣裾
方伯草堂多蔓草
堂前水綠如醍醐
我幼憶曾告慈母
為官人

盡高門閭外大父位
躋方岳今看甲第何
無餘維時母隨訓
小子為官豈在多
錢乎外祖建節鎮西
粵胡威清白無差殊
總作高官不治宅
幾間老屋藏詩書
今適來此坐竟日
徘徊四顧增欷歔
花墻一帶壓叢竹
藥闌半畝游鼉鼉
方池漱灑壅落葉
古木輪囷巢昏烏
藏書人盡書亦盡
蠹魚饑死無煩祛
惟有莓苔匝曲徑
班班溜雨如金鋪
天平廉吏應不負
子孫困阨當何如
須知越中撫仕諸
大履朝彼暮此誰
寧居

宛委山人詩集卷一

宛委山人詩集卷二

蓬萊閣稿

寒食讌集蓬萊閣即席限韻分賦

山陰 劉 正誼 戒謀

千疊晴巒秀可餐
庾公載酒任疎頑
繁花紅映重
重樹綺席青圍面
面山冷節忽因人
意熱叢愁盡
為酒杯刪身
前曾否親香案也
廁蓬萊仙吏間

本

玉皇香案吏謫居猶得住蓬萊元微之以州宅誇樂天句也故府治有蓬萊閣

逢時媚世歎勞勞
放浪誰能似我曹
香度隔墻楊柳笛
春濃小盞李花醪
未酌白雪千秋句
先領青

松萬斛濤安得連朝攜画楫扁舟觴咏試輕篙
倘難免俗便堪嗟聲氣相親是一家幽砌微香放
蕙草疎簾碎雪落梨花口因雅謔開難合頭爲狂
吟整復斜欲倩丹青圖勝集幾人野服間袈裟
曲曲闌干薄暮凭疎林斜日影鬢髻尋香似趁花
鬚蝶預勝真同驥尾蠅醉繼劉伶誰可匹狂如阮
籍我兼能他時倘了紅塵事共上輕航入武陵

望海亭呈郡侯宋靜溪先生

蠡城抱八山卧龍居第一長身行蜿蜒危峰聳翠
律有閣號蓬萊肇自元楨述亭以望海名巍峩高

莫匹舉日向四方無遠不能極而俱依官衙可望
詎可即如彼海外山凡人安得識維昔靳使君引
我常游歷今茲宋廣平襟懷復飄逸下訪菰蘆人
置入瀛洲室曰余得一君國人足矜式仙山縱歌
吟仙閣翻細帙分刺署中人風流有吳質晨夕亦
邀留前後恣降陟每欲豁雙眸卓爾孤亭立萬井
人煙繁千里山川密海氣昏茫茫欲作長鯨吸我
思昔此亭豈爲游觀葺若云望海氛猶不知其實
東南百萬家俯視紛如織民力孔艱難如何通胸
臆太守時觀瞻處處施軫恤

春日飲吳四丈署齋次韻

清暑垂楊一徑陰
雛禽花裡試新音
每來便得觀三絕
小咏何知論四深
園角肥蔬味獨至
床頭旨酒手交斟
化工忽發冬藏雪
灑盡遙林與近林
幾載晨昏歡笑同
鶯花又復際春風
酒兵正好微軀率
詩壘全憂夫子攻
柳似金垂疑或剪
雪如玉碎豈天礮
昂頭癡自停杯想
忽入甜鄉短榻中

禹陵春游詞

穉柳夭桃夾岼開
画船簫鼓滿湖隈
青青山色都迎笑
又引游人一片來

松陰柳下駐青絲
白面蒼髯夾隊馳
學得衣冠玉帛字
紛來禹廟說題詩

雜沓紅妝兩黛纖
相逢故故作矜嚴
軟泥行路無青草
印與人看小鳳尖

夏王陵下夕陽西南
鎮祠前暮靄迷人影
衣香驀地散春山
十里子規啼

龍山飲月歌

龍山高閣東風溫
千花百卉香盈門
中春夜靜張綺席
濛濛窓戶煙雲屯
忽然東方上明月
入雲木杪懸金盆
在眼衆山都歷歷
清光蕩漾流乾坤
倬

宛委山人詩集 卷二
枝幽鳥聲嘆喑垂檐弱柳絲翩翩松濤萬壑迎風
起四圍入耳如雷奔滿懷清興不可說何況有酒
盈芳樽我愛看月碧湖裡蘭橈獨鼓沿江村此時
七尺入明鏡紅塵一點能相混不然看月朱樓上
翠簾半捲疑晨暎玉人金筓笑相勸簫聲花片飛
黃昏今夕何夕飲仙閣欲論此樂殊難論霏霏清
語憑風隨涓涓花露如鯨吞倚盡回闌十二曲飄
飄天半飛吟魂

蓬萊閣懷雁堂先生

寒江折柳庾公行景物驚看次第更積雪又同鴻

影盡春風知逐馬蹄生閒愁縹緲消無策幽夢荒
唐記不明漠漠雲山勞極目吟鞭何日指蠡城
每望天涯駐紫騮曾聞昨日下午揚州水心豈愛纏
腰返仙骨知惟領鶴游芳草香雲春日路濃花淥
水使星舟佇看重到蓬萊地許共清尊遣積愁

同素堂香粉巷訪友

香粉春風巷雙扉掩碧苔不知孤客坐能料兩人
來細雨桃花孕輕煙柳葉開小僮應剝啄一笑洗
樽罌

次韻靳公見懷二絕

五馬東來首問民百錢攜送賀公貧萬山紫翠亭
幽絕鳥坐花飛又一春
曲身才至燎烏薪雪後傳杯玉辟塵今日錦帆度
北郭含思最是十詩人

送魯三思亭省方伯公粵東

長短亭前柳萬條驪歌聲忽起清宵殘花別淚爭
零落粧閣詩壇兩寂寥摒擋煩愁一棹去收羅風
月片帆飄知交晨夕星同散嗟我如何得自聊
春光彈指去匆匆一徑殘英逐晚風我欲避愁出
天外君偏添恨去江東板橋茅店吟魂遠斷嶺危

灘句子工屈指趨庭萊舞日官衙正好荔枝紅

蓬萊閣小集

顏唐雲影數峰支爛熳春光又一時記得探梅前
度醉東風剪雪撲簾絲

花間殘照漸移檣搖蕩柔條鳥夢醒望入畫橋添
暝色一聲漁唱隔煙聽

誰弄瑤箏弱柳邊濛濛飛絮欲漫天當壚人在千
花外指點銀鉸憶去年

浮空花霧濕衣寒燭跋頻更語夜闌却笑江南老
詞客詩名不肯換粗官

不辭千日倒芳樽看盡烟絲共雨痕安得爐薰如
聚窟亂紅飛處返香魂

竹裡人窺座上才雲藍分送句頻催含毫正對桃
花笑長笛聲聲又落梅

霸圖銷歇古今殊何處荒臺宿鷓鴣猶有春城好
風月耐人花底捲蝦鬚

朱碧紛圍便足豪銀絲斫鱠玉為醪蓬萊近在花
深處十二瓊樓枉說高

舞蔗彈碁我未如淋漓醉墨溼長裾仙山樓閣須
凭徧莫賸紅闌半角餘

欲截飛虹作彩橋凌虛春恨一時消更闌不放園
花睡官燭還燒四五條

攫取驪龍一片鱗狂來高閣寫紅巾笑誰多事帷
常下負却人間幾許春

淺深芳榭露光濃鶴羽毳點落紅不薄當年香
艷格才如溫李許相同

余合同郡十二子築別業宛委山人各一
廬榜其別號當花晨月夕令節佳時群集

訓和名曰東越詩巢春日宋郡侯及司馬
別駕山會兩明府置酒大會諸同學於巢

中即席紀事

宛委山高，高凌雲。四時佳氣，浮氤氳。靈秀靈知，特天地種萬山，環拱誰能群。梅花梁作，神龍舞石，書匱秘先天。文一穴內，實藏神禹，仙人來往，真紛紜。蒼牙參差，幾間屋。昔合同心，此卜築一灣。綵繚春溪，波百株輪囷。虬松木疎籬，曲沼布隨宜。小亭石磴，寧嫌複梅花。近復植成林，從以梧桐、桃柳、竹、越州官長多風流。暇糾騷客，尋良游。輿從遠屏十里外，清攜殽榼，乘扁舟。到山握手互慰藉，觴咏並起情。油油適意，不拘坐或走。總要是處遊，清眸商氏介。

廬居其長，廬中結構人爭仰。商君和號介廬幽香逸韻愛蓮

溪。施君敞號蓮溪石渠清流流澹沲。錢君為鼎號石渠石梁飛駕如長

虹。厲君煌號石梁笥山兀峙溪渠上。何君嘉珮號笥山何與厲齒並居錢施二子上竹溪瀟

灑臨素堂。王君鶴齡號素堂徐君之熾號竹溪易堂雪堂對開爽。田君易號易堂魯君

雪堂。國書號查軒精潔倚芥山。朱君悅仁號查軒王君徐齡號芥山思亭後聳何

幽閒。魯君士號思亭我樓百尺收萬象，四壁峭立峰回環。余書

樓名宛委山房時人不識經營苦，動思巢上來追攀。名流勝

地兩美合，雄視海內如秦關。春風吹動千花麗，綠

波翠嶂爭明媚。籠頭紗帽折角巾，出處人殊心豈

異。吾儕聚散亦不常，使君此會良非易。白袷奚奴

宛委山人詩集 卷二
捧硯來劉生役管為之記

鶯

翩然新出谷金縷巧裁衣百轉音何婉雙柑聽不
歸咒桃紅雨浣栖柳綠烟圍要得佳人惜秋千架
畔飛

燕

常因春社至刷羽羨雙齊偶入朱門語寧嫌蓬戶
栖影低楊柳陌巢補杏花泥莫話烏衣事斜陽一
片迷

鷓鴣

絮飛花事盡獨汝最關情林際千聲度天涯百感
生画樓心欲碎孤館夢難成躑躅枝頭染啼痕點
點明

雁

吳江楓未落嘹唳已南來風急飛難定雲迷聲更
哀一行過馬首萬里別龍堆避弋高翔好休將健
翮摧

送春和吳紫瀾為瀚韻

楊花乳燕繞簾飛太息芳春草草歸酒冷香消愁
滿鏡江空人遠淚盈衣一聲長笛千紅亂幾樹殘

鶯萬綠肥誰識高樓惆悵客凭闌無計繫斜暉

咏劍

千金購湛盧不向囊中秘夜夜拭燈前細數平生事

一握寒如水休論七寶裝鉛刀遍天下何處露光芒

碧霞灣述意

山為先慈葬域

我聞韓淮陰經營母葬地旁可置萬家壯哉貧時志
誼也敢與倫惟殫人子意七載覓山川力竭敢言瘁
愛此碧霞灣靈竒天地闊千山合沓來衆水

彎環至樵風涇左圍神禹陵右庇石帆玉筍峰一
一端位置豈期守塚多所欣名勝萃結廬依我親
他年世可避

寄錢石渠

為鼎

乍看陌上返雙輪又向他鄉逐軟塵別覺甚匆疑
怨我饑何太惡慣驅人苗針菱葉垂垂老蓮子芹
芽冉冉新酒醒夢回遙獨望一天月色空

去聲如銀

送田十三易堂之粵

生平無他憂但願免離索垂髫賦結交日罄千金
橐我有酒如池簪履合歌嘏我有肉如陵車馬集

歡樂近日黃金銷諸君步亦却卓哉田子方富貴
從來薄四方達令聞萬卷窮淵博奕奕人中龍矯
矯雞群鶴數歲山巢中聯床破寂寞風月互評衡
詩酒交斟酌忽將嶺南游別我蓬萊閣嗟我玉與
刀藉汝礪而錯一朝欲遠行數日中懷惡我聞羅
浮山萬仞青如削又聞南海洋波浪兼天作東坡
儋耳歸文章緣益拓所悵我同袍天涯盡飄泊江
上舟搖搖山中雲漠漠試看眼前人中懷誰可託

題董明府學稼圖應祖司馬

懸輿解組任逍遙學稼樓成似午橋只愛身來歸

稻隴肯將心去向金貂挂書牛出青堤健饋餉人
行綠野嬌蕉扇羅衣垂柳下此生自信不無聊
碌碌風塵底足誇投簪豈用復巾車盧生走徑名
何在陶令歸田趣轉賒幾樹垂楊斜作浪一池新
藕艷生花清吟石上消長晝不憶當時放曉衙

乾蝴蝶

莫問朱欄綺榭邊輕盈情性化如煙年年花裡風
流活粉褪香銷亦可憐

自東郭至石帆山即事寄吳四丈

冷冷縱輕舟滿路流花片濃烟靄青雲垂楊搖碧

線十里畫圖行兩岼香風扇紅蘿詩客巢綠樹神
王殿沂洄任樵風孤帆走溪面不見白鶴歸安見
仙人箭曲曲石帆山萬卉生如絢下有小烏蓬群
人集歡讌忽云景極佳惜罕詩人見余聞即諭之
微軀斯頗擅一人奉清尊一人磨小硯揮毫一短
吟一一均稱善笑語諸井蛙如斯奚足羨尚有真
詩人深坐蓬萊院

聞笛

何處吹羌笛空庭夜獨聞悠揚媚素月斷續入寒
雲舊恨三千斛新愁十二分無聊人靜倚花影落

紛紛

久旱喜雨用東坡和孔毅甫久旱已而甚
雨三首之一韻

暮春霖雨江河溢萬人如夢百事失自夏徂秋斷
雨絲天乎豈欲殺萬物我黍我稷餘枯株其雨其
雨轉日出擔薪如桂錢不論斗米如珠粒難乞深
河曲港成平原千家百家煙銷突官長徬徨禁宰
屠茹蔬步禱號神佛忽然天竟回仁心雨師風伯
排秩秩次第分行下土來愁雲四起如深恤吁嗟
東南百萬生不呼愁苦千無一一日微雨喜沁心

一日大雨爽入骨腐儒夢裡尚憂饑醒忽聞聲滿
蓬葦焚香稽首向蒼穹始信青天不可屈眼看禾
稻發千疇聽覺歡聲滿百室褰裳笑問田間農爾
輩從今舒抑鬱湖中小艇久不拏新漲烟波泛十
日

寄龔少白 汝賓

忽忽悠悠土木骸竹林結侶劇舒懷香螺画榼今
零落一鍾劉伶真可埋

石屋禪院次韻

風雅江南客幽奇約共尋秋殘微氣肅葉盡尚林

深犬吠溪中影人流雲外音此游非草草莫浪掉
頭吟

漫村楓葉艷匝寺菊花香白雪華僧首黃金麗佛
床虎如鷗可狎 崖名鷗虎天作瓦何長 巖名天瓦攬勝能經
此生平得易忘

空巖陟自轟一隙漏青天安得驅塵累長來枕石
眠蒼苔留夜雨白鷺破溪烟萬斛松濤好清風處
處傳

積翠香爐嶺藏書玉筍峰出檐高萬仞對戶折千
重戰茗炊黃葉聯詩據赤松還期攜襪被信宿聽

晨鐘

坐雨

寒雨迷濛水一方
憑山官舍儼村莊
疎窓竹粉侵
鬚綠小榭茶煙颺
鬢香漸好題糕張
酒興豈憂催
稅亂詩腸閒門盡
日無人至獨守橫
琴夢蝶床

送紫瀾

兩載官衙笑語親
崇朝判袂最傷神
邗江越水經
旬後同作臨風相憶人
料得風流隋苑邊
瓊樓高處布青氈
異時相訪誰
遙指帆飽如弓鴨嘴船

鑑湖雨汎聯句

夢憶湖上山乘雨
看新沐雲欺鷺羽白
吳詩成水皺

鴨頭綠小艇蘸
蓑衣濃樹溼蘿屋
何嘉釵股荇藻

交珠顆菱荷簇
秧苗翻翠針
劉正魚子隱輕澱放

翁餘數椽知章留
一曲詩成始知前哲心
要豁後

人目煙光倏晦明
嘉翊巒影競奔逐
清樽恣狂呼

好景求饜足
噍曉林出禽拳
曲籬眠犢流覽情自

移正誼爬搔垢捐宿
老手揮珠璣大斗酌
醺醪坐

我南宮圖詩成陋彼季倫
谷磅礴才互矜淋漓墨

盈掬鉢響苦不長
嘉翊毫拈笑偏禿雞口較雄雌

蝸角紛蠻觸微如廣陌塵眇若太倉粟容身萬斛

舟正誼抽思五車腹清臞淡啜醯膏腴鄙食肉汪

汪千頃波嘉珩一葦肆瞻矚造化縱靈奇世網縛

庸碌歡腸倒蔗佳妙理濁醪獨霧藏鴟鳩鳴候變

楊梅熟正誼忽記桃作花會將漿搖淥綺席彈柔

絲艷妝凝曼睳湘臯珮欲投洛渚賦重續紅芳竟

拉摧詩成綠葉爭繁縟積雨沒魚梁微風生澤國

纖鱗潑刺游層雲鬣隼感怒蛙聒野田倦雀啁叢

木回撓汎泠泠正誼曳纜行縮縮岼草覆蒙茸隰

桑紛撲檄鳩婦呼太勞竹孫長何速詩成漫村縹

車聲新絲上杼軸酣歌踏農畝青蔥喜沾沃吾儕

跌宕人跬步宵局促嘉珩落落成一家林林任萬

族擘箋信手拈得句聾牙讀詩成快論峽倒流豪

吟雷脫輻詎讓奭雕龍聊同髡炙轂俯仰天地寬

吐納山川肅混茫關巨觀摹繪在尺幅正誼驕陽

喜焱潛兔魄迷朮胸鮮割雪色魴酒敵雲安麴更

令瓦盆傾共脫葛巾漉詩成有癖號書淫無方醫

士俗五字各為城嘉珩八州誰羨督巧匠貴自然

拙工事穿鑿正誼兩君洵天人賤子甘臣僕樂此

憺忘歸坐對晚鳧浴詩成

宛委山人詩集卷二

